

Na Chamuy Surat Pedro

¹ Saon à Pedro wi osay apostoles Jesu Cristu, ad annayan surat-un chiayuy napipilliyan à mantakun Apudyus wi niwaras ta il-ili ta chachi provinsiyad Ponto, Galacia, Capadocia, Asia ya Bitinia. ² Pinipilliyan chiayun Apudyus wi Ama à tumuttuwaan na simsimmònà. Ad namfalinon na Ispiritunà chiayù naapudyusani taku à mantomtokanyun Jesu Cristu ya macharusanyu kapu ta nifùfuan na charana.

Sapay kuma ta fadngan chiayu losan an Apudyus ya farfaruwona kon somsomòyu.

Na Sikurachuy Namnamatau

2 Tes. 2:13-17; Jaime 1:2-8; 1 Ped. 4:12-13

³ Manyamantaun Apudyus wi Aman Aputauy Jesu Cristu! Tan kapu ta sachì amochi sayaawna, niyanàtaun siyà mafaliwan na mafiyakantau kapu ta ummuliyan Jesu Cristu natakuwan. Ad sachin manikurachuwantau ta sachì namnamaontau ⁴ wi makauwa ta losani inchulin Apudyus ad langit wi para an chitauy takuna. Na nangichulinanad langit, ta maid pu makachachail ya achi pu ko lumawing ya achi pun mamfarfaliw à ing-ingkana. ⁵ Man-uwatau losan chachi, chitauy mamiyar ta mannakafalin Apudyus wi mangayyuwan an chitau ingkanà mangipail-ana ta lisortan na manaraknifanan chitau ta anungus na padcha.

6 Siyan kapilitani lumagsak-ayu met, uray nu mansikab na somsomòyù sin-aitan ta maparparlikatanyu ta sana wi achuy likat. **7** Tan na achuy likat wi mipachasyu, sachin mail-an na katuttuwaan na pammatiyu. Tan ilanyu, uray falituk wi para kay ta annay luta, maapuyan tapnu mail-an na kinafalitukna. Ad napatpatog na pammatiyu nu falituk, ad na mapalikatan ako ta likat sachin mail-an na katuttuwaana. Ad kapu ta tuttuway pammatiyu, siyan machayawayayu ya mipangatuayu ko ta mangulinan Jesu Cristu. **8** Ad à Jesu Cristu, uray nu chaanyu pu ilan à siya, ay-ayatonyu ko kà siya, ad uray foon pù ilanyù siya ta sana, mamatiayun siya. Siyan amod na lagsakyu wi maid miyisuwana. **9** Tan na lisortan na pammatiyu masaraknifanyu wi sachin pangkop na namatiyanyun Cristu.

10 Ad chachi profetas Apudyus ta awi, uray nu chichan nangifikà mipangkop ta masaraknifantau, innonongnongcha inuna inachar-achar na mipangkop ta annay masaraknifan ta maaawwatachanta achichaot ifakan mangadchan Apudyus an chiayu. **11** Inanaanapcha nu sinun ustuy timpun na màwaana ya in-inon akon milasinana. Tan na Ispiritun Cristu wi iningkaw an chicha, impaakammunan mapalikatan Cristu wi siyan ifaun Apudyus ya uray akon michayawana. **12** Sachi ad nipaakammu kon chicha wi foon pù timpuchan màwaana tan màwa ta annayay timputau. Ad tuttuway nàwan chiayu ta sana tan sachin fokas na Mamfaruy Chamag wi chingngoryu ta nangitudtuchuwan chachi takuy

finadngan na Ispiritun Apudyus wi siyan nifaun ad asnay luta wi narpud langit. Ad nu mafalin, uray chachi aangheles pioncha koy mangachar ta mipangkop ta anchanayay fanag.

*Na Mamfaruwon Apudyus Wi Mafiyakan
Rom. 12; 1 Cor. 3:16-17*

¹³ Siyan chaachaanonyu ta somsomòyu, ya man-annad-ayu ko. Ya oognanyu kan nammaontau wi mamfaruwon Apudyus an chitau ta mangulinan Jesu Cristu. ¹⁴ An-ananà chiayun Apudyus, siyan masapur patkonyù siya wi achiyu parufusan na maawisan na somsomòyu wi asin mangwa ta chachi lawing wi piniyayu iningwa ta chaanyu pù nangakammuwan ta katuttuwaan. ¹⁵ Ad na oyyoonyu kuma afus na mamfaruwon Apudyus tan sikud wi mamfarù Apudyus wi namili an chiayu. ¹⁶ Tan niyug-is ta ukud Apudyus wi, “Maid pu fasur-u, ad surutonà kuma.”

¹⁷ Siya awakanyù Apudyus à Amayu ta mal-luwaruwanyun siya, siyan masapur iyafainyù siya ta sanay mafiyakanyud asnay luta, tan maid laksikona ta manguisana ta atakutaku tan adchona ta waschi osa na miyunud wi ining-wana. ¹⁸ Tan akammuyu kon kinapatog na fayad na nasaraknifanyu ta chachi achawiyan wi tinawidyu ta aappuyu wi maid ifachangnan chiayu. Ad na insubfutnan chiayu, foon à pilak winnu falituk wi màway mafaliwan na kinapatogcha, ¹⁹ tan na insubfutna, apatkan wi charan Cristu wi nifùfù ta natayana. À siya, isù pannilu wi maid purus lufiktuna wi ichatunchan

Apudyus, tan maid pun osà fasurna. ²⁰ Nanipud ta chaampunan na lufung màwaan, simsimmò Apudyus wi sachin màwa, ad nàwa ta sanay timputau à fumaruwantau losan. ²¹ Ad kapu ta iningwan Jesu Cristu, piyaronyù Apudyus wi nangipaulin siya nanaku ta natayana, ya nangipachayaw akon siya. Ad siyan pangkop na pammatiyun Apudyus ya namnamayu kon siya.

²² Ad ako, kapu ta namtokanyu ta katutuwaan, nacharusan na somsomòyu wi sachin puun na ustuy mangay-ayatanyu ta susunudyuy mamati. Siyan na ifakà, papigsaonyun manasiay-ayatanyu ta losani somsomòyu wi foon pu kà tupòyu, ²³ tan na namatiyanyu ta ukud Apudyus, wi mannaynayuni katuttuwaan ya asififiyang, asin-ayu niyanà, ngim foon pù isun na niyanaan na taku wi matoy, tan niyanàayu an Apudyus wi achi pu matmatoy à ing-ingkana. ²⁴ Isun na niyug-is wi ukudna, wi anana,

“Na losani taku, isucha kà charus wi mallasù maryaw ad natoy, ad na kinafarucha ko, isun yakà tabfà na charus, wi nu maryaw na charus, mayakayag akon tabfàna ad maid.

²⁵ Ngim na inukud Apudyus, sachin iingkaw à ing-ingkana.”

Ad na sahi ukud Apudyus, siyan Mamfaruy Chamag wi nipagngor an chiayu.

2

*Na Niyalikan Jesu Cristù Fatu Wi Asiffiyag
Mat. 21:42; Rom. 9:33; 10:11; 1 Cor. 3:10-17*

¹ Siyan, kapu ta niyanàayun Apudyus masapur iwarangyun losani lawing. Siyan achi pu kuma mafalin wi awad na turtulli ya ag-akinfafaru an chiayu ya uray akon apos ya lawingi ug-ugkud ta asintatakyu. ² Tan na oyyoonyu kuma, isun na maryachan na àiyanà wi sumusususu, siyan isun kuman maryachanyu wi mangad-achar ta ukud Apudyus à pumigsaan na pammatiyu ingkanà mitapiyanyun siya ta anungus na padcha, ³ tan nar-usyu linìna na kinafarun Apudyus.

⁴ Siyan adchonyun long-agyun Apu Jesu Cristu wi puun na mannaynayuni fiyag. Ad na miyalikana, siyan isun na fatu wi inwalin na mantuping tan maid silfina, ngim piniliyan Apudyus à apatkan tan siyan mamon-ad. ⁵ Siyan kapu ta tinakun Apudyus chiayu, adchonyun long-agyun siyà isù fatu wi mausar ta mangwaana ta foroynà machayawana. Ad namfalinon ako Apudyus chiayù isù pachi wi mansilfin siya wi na ichatunyun siyan yaman ya chayaw. Ad akseptaron ako Apudyus na sachí oyyoonyu, kapu ta iningwan Jesu Cristu. ⁶ Tan na niyug-is wi ukud Apudyus mipangkop an Jesu Cristu, anana,

“Awad na piniliyà wi iparoswà ad Sion wi siyan isù apatkani fatu tan siyan mipon-ad. Ad sinumani mamatin siya, maid mifafainanà ing-ingkana.”

⁷ An chiayuy mamati, isag napatog na sachí naawakan à fatu. Ngim na chachi achi pu mamati, safali, tan chichan tummuttuwaan na sachí niyug-is wi anana,

“Na fatu wi inwalin chachi mangkaob ta foroy,
wi ananchay maid silfina, sachin namfalin
apatkan wi namon-ad.”

⁸ Ad na osa koy niyug-is, anana,

“Sana kon fatuy misufuan na takù milus-
ufancha.”

Ngim na misufuancha, achicha pu mamati ta
ukud Apudyus, wi sachin màwan chicha.

⁹ Ngim chitau, chitaun pilliyan Ali wi Apudyus
à man-anàna ya mampachina wi mansilfin siya.
Ad chinarusana kò chitaù milasinantau ta chachi
uchum à mantakuna. Siyan chitau wi sikuchi
iningkaw ta pangot ta chamu, inatunna chitau
ta kaskaschaaw wi lawagna, ta chitaun mangi-
warawag ta kinafarun na iningwanay machay-
chayaw.

¹⁰ Na sin-arkawan, foon pù takun Apudyus
chitau, ad maid pu ko akammatau ta sayaawna.
Ngim na sana wi nantakunà chitau, inakammu-
tau kon sayaawna.

Na Oyyoon Wi Mansilfi An Apudyus *Rom. 13:1-7; Tito 3:1-11*

¹¹ Susunud, isutaù fisita wi foon à manakus
ta annay luta tan langit na ustuy fumroyantau!
Siyan masapur achiyu oyyoon na lawing wi
sikuchi pipion na long-ag tan chichan manachail
ta pammatitau. ¹² Ya laramanyun oyyoonyu ta
takuy achi pu mamati ta uray nu ipafasurchan
lawing an chiayu, nu mamàilan mamfaru wi
oyyoonyu, sachin mapilitancha wi manayaw an
Apudyus ta umaliyana manguisan ta atakutaku.

13 À machayawan Apu Jesu Cristu, masapur patkontau kon losani manturay. Siyan masapur patkonyun angatuwani turay, **14** ya uray akon chachi fifinnachur wi piniyarnà manusata chachi mangwà lawing ya manayaw ako ta chachi mangwa ta ustu.

15 Tan na pion Apudyus siya kay oyyoonyun mamfaru à kuminoan chachi man-ukuukud à lawing wi maid akammuchan Apudyus. **16** Inaan Apudyus na kinasaniluyu ta fasur maid nginsanilun chiayu. Ngim achiyu ko mallasunchì mangwaanyu ta sinumani lawing, ngim ipailayu ta mafiyakanyu wi chiayun sanilun Apudyus ta mangwaanyu ta piona. **17** Masapur lispiuwonyun losani taku, ya ay-ayatonyun losani susunudyuy mamati. Ya masapur iyafainyù Apudyus, ya lispiuwonyu kon turayyu.

Turachonyun Kinaanus Cristu Ta Nampa-likatana

Ef. 6:5-8; Col. 3:22-25; 1 Juan 3:13-18

18 Chiayuy sasannilu, masapur patkonyun ifakan na ap-apuyu ya lispiuwonyu ko chicha wi foon pu kà afus na ap-apu wi naanus ya mansayaaw tan uray akon chachi nan-ayung. **19** Tan mamfaruwon Apudyus na takuy mangananus ta mapalikatana uray foon à orognay mapalikatan, wi na mangan-anusana mipakapu kay ta mammammoanan Apudyus. **20** Tan maid pu takù machayaw kapu ta nanganusana ta napalikatana nu tuttuway nangwà lawing. Ngim uray nu oyyoonyun ustu ya palikatan chiayu, nu anusanyu sachin mamfaruwon Apudyus an

chiayu. ²¹ Tan sachin nangayakan Apudyus an chiayuy mamati wi anusanyun liglikat. Tan uray à Cristu, inan-anusanay napalikatan mipakapun chiayu ad siyan impailanan manurachanyu ta nangan-anusana. ²² Tan à Cristu, maid purus fasurna, ya maid inug-ugkudnà turtulli. ²³ Ad na sachin koy nangin-insurtuwanchan siya maid pu ko insongsongfatnà lawing. Ad na namarpalikatancha kon siya foon pu kò sinufalitana tan siya kay piniyarnà Apudyus wi nalimpiw wi Kuis. ²⁴ À Cristu, finuudnan losani fasurtau ta natayana ta kros ta awad in-inontauy mamagpag ta fumasurantau ya ta makàwatau ko ta sinuy mamfaruwona. Tan na nasukatana, sachin nangipafarawan Apudyus an chitau. ²⁵ Tan na chamu, isutaù natarà wi pannilu. Ngim na sana, inyulin chitau an Jesu Cristu wi siyan Pastortau ya mangayyuwan an chiayu.

3

*Na Tudtuchun Pedro Ta Man-asawa
Ef. 5:21-33; Col. 3:12-19; 1 Tim. 2:8-15*

¹ An chiayu koy naasaw-an wi fubfufai, masapur ipafafayun long-agyu ta aassawayu ta nu kaspangalikan awad na uchum an chichà chaan pu mamati ta ukud Apudyus, mamaticha nin nu ilanchan mamfaruy achawiyanyu. Siyan foon à masapur na manudtuchuwanyun chicha, ² tan iillanchan kinafarun na achawiyanyu ya pinaglisputuyu, ad sachin maawisancha. ³ Ya foon pu kò mangigkaanyu ta ang-angkayun mangipaila ta kinamagkityuy fubfufai, ya uray

akon chachi manakaysayanyu ta fuìyu. ⁴ Tan na mangipaila ta tuttuway kinamagkityu siyan mangimanmananyu ta oy-oyyoonyu wi isun na anusyu ya annadyu, tan sachin mannaynayuni kinafaru wi patkan Apudyus. ⁵ Ad sachin kon iningwan chachi namati wi fubfufai ta awi ta mangipail-ancha ta kinamagkitcha, tan pinatichà Apudyus ad impafafachan long-agcha ta aas-sawacha. ⁶ Isun Sara, wi pintognà Abraham wi asawana ad inawakanà siyà ap-apuna. Siyan uray chiayu ta sana, miyalig-ayù kanà Sara nu oyyoonyun ustu ya foon à maanogyat-ayu.

⁷ Ad isuna kon chiayuy naasaw-an wi lallarai. Tan masapur ko wi ayyuwananyun aassawayu ya man-anus-ayu ya maawatanyu kuman kakangay na fufai, tan naos-oschor-ayu nu chicha. Ya masapur ko wi lispiuwonyu chicha tan makauwacha ko ta mannaynayuni fiyag. Amaschin oyyoonyu ta maid mataktakan na luwaruyun Apudyus.

Oyyoonyun Ustu Uray Mapalikatanta

1 Cor. 6:1-11; 1 Ped. 4:12-16

⁸ Na uchumi ifakà an chiayuy mamati, amasna: masapur mantitimpuyukonyun somsomòyu wi isuayù mismuy mansusunud wi man-asiay-ayat ya man-asisayaaw. Ya masapur wi waschi osa ipafafanan long-agna ta furunna. ⁹ Ad nu awad mangwà lawing an chiayu, achiyu sufalitan à lawing. Ya isun akon ifakachan chiayuy lawing, achiyu ko songfatan à lawing. Ta na oyyoonyu, sufalitanyu chichà mamfaru, tan sachin namiliyan Apudyus an chiayu, ta oyyoonyun

mamfaru à manawichanyu ko ta mamfaru. ¹⁰ Na sachì niyug-is wi ukudna, anana,

“Sinumani maryad wi mamfarun mafiyakana ya maryad akoy lumagsak, masapur achina pu parufusan na tupòna wi man-ukud à lawing ya achi pu ko manturtulli.

¹¹ Ya masapur man-awichanan lawing ta mamfarun sakungona, ya ipapatina ko wi mangap ta ustuy pinagfurfurunna ta uchum.

¹² Tan à Apudyus, ayyuwananan sinumani mangwa ta mamfaru ya chochongronan luwarucha. Ngim kuraonan losani mangwa ta lawing.”

¹³ Maid mallawinganchan chiayu nu ipapatiyu wi mangwa ta ustu. ¹⁴ Ngim nu kaspangalikan palikatan chiayu, uray mamfarun oyyoonyu, lumagragsak-ayu ko kay! Achiayu umogyat ta sinuman ya achiayu machanakan, ¹⁵ ta siya kay oognanyun nangapuwanyun Cristu ya iyafainyù siya. Ya makasakanaayu ko wi manongfat ta sinumani mangimus mipangkop ta pammatiyu.

¹⁶ Ngim masapur am-ammaanyù mail-an na lispituyun chicha. Ya an-annachanyu ko ta maid mitatarù lawing ta somsomòyu. Tan nu amaschi, mafain chachi mangifakà lawing ta mamfaruy oyyoonyu mipakapu ta pammatiyun Cristu. ¹⁷ Tan un-unnoy nu mapalikatantu ta mangwaantau ta mamfaru, nu sachin pion Apudyus, nu mapalikatantu kapu ta mangwaantau ta lawing. ¹⁸ Isun Jesu Cristu wi maid purus fasurna, ngim mipakapun chitauy mangfasur, naparpalikatan ingkanan natayanà na-

mayachana ta fasurtau. Ad umanay na sachì ing-
ingkanà mangiyayanan chitaun Apudyus. Ngim
uray pinatoychan long-agna, natattaku met na
alichodwana. ¹⁹ Ad na alichodwana, ummoy
nantudtuchu ta chachi nifafarud wi alichod-
wan ²⁰ na chachi nan-oootoy ta awi wi chichan
chachi achi pu mamatin Apudyus ta timpun
Noe. Inuullay Apudyus na mamatiyancha ta
unog na sachì timpun na nangwaan Noe ta
papur, ngim na afusi nasaraknifan yakay ta sachì
timpuy nalitapan na luta warucha kay. ²¹ Ad na
miyalikan na nasaraknifancha ta chanum, isun
na funyag wi mangipaila ta masaraknifantau ta
manguisan Apudyus. Ngim foon pù maurasan na
kaisaw na long-ag na ukuchona à makasaraknib
an chitau, tan na manchawatantau an Apudyus
ta urasanan fasurtau. Tan na tummuttuwaan na
masaraknifantau siyan ummuliyan Jesu Cristu
natakuwan ta natayana. ²² Ad ummuli pù
Jesu Cristu nataku, ummod langit wi awachana
ta sana ta apot ta machiwawan Apudyus itu-
rayanan losani aangheles ya losani turay ya
losan akoy mannakafalin wi nailangitan.

4

Na Puntus Na Likat 2 Cor. 5:14-21

¹ À Cristu, napalikatan ta sachì nafiyakana
ad asnay luta, siyan uray chiayu, masapur pa-
pigmaonyu kon somsomòyu wi isun na pinagsom-
sommòna tan amaschi kon màwan chiayu. Tan
na mapalikatan na long-ag, sachin maaanan na
maryachan wi fumasur. ² Siyan nanipud ta sana

ya ingkanà matayanyu, masapur ipapatiyu wi mangwa ta pion Apudyus wi foon pù sikuchi maryachan na long-ag ta lawing. ³ Foon pu kumà turachonyun oy-oyyoon chachi maid pammatina wi isun na iningwayu ta sin-arkawan ta chaanyu pu mamatian. Tan na sachì, makaàawaayu ya mansallisallimong ya manlukuruku wi maid lin-ausanyu ta lawingi pipion na long-ag. Ya afafain akon iningwayu wi nanayaw ta sinan-Apudyus. ⁴ Ngim na sana, maschaaw na chachi chamuy fufurunu kapu ta nangiwaranganyuy mitapin chicha ta mangwaancha ta amaschi. Siyan sachin manginsurtuwanchan chiayu. ⁵ Ngim achifali tan chumatong na padchay masapur songfatanchan Apudyus na losani oy-oyyooncha, tan à Apudyus, nakasakana wi manguis ta losani taku wi uray na natoy ya uray na chaan pun. ⁶ Siyan sachì kon nipagngoran na Mamfaruy Chamag ta chachi nanattoy, ta uray nu natoy na long-agcha wi sachin nitawid ta losani taku kapu ta fasur, mafalin wi maatod an chichan mannaynayuni mafiyakan wi isun na mafiyakan Apudyus.

*Na Mangwaan Ta Nipiyar An Chitau
Rom. 12:3-13; 1 Cor. 12:4-11; Ef. 4:11-16*

⁷ Machanchanin mapagpakan na losan siyan masapur imanmanyun oyyoonyu ya man-annad-ayu ta maid manaktak ta malluwaruwanyu. ⁸ Ad na patkanyu kuma, masapur isag-ayu man-asiay-ayat, tan na mangay-ayatan ta furun, sachin foon à mamammoan ta fumasurana. ⁹ Ya ipaingsayu

kuma wi mammangili wi maid ngumuuynguy-tungut an chiayu. ¹⁰ Ad kapu ta waschi osa awad na innadchon Apudyus à karobfongana wi maiturung ta fufurunna, siyan masapur kuma wi mapipiyar wi mangusar ta sachì à maturungan na uchum. ¹¹ Siyan na naadchan à karobfongana wi mantudtuchu, masapur itudtuchunan inug-ugkud Apudyus. Ad na naadchan à karobfongana wi fumachang, masapur ko fumachafachang à patingkan na karobfongan wi innadchon Apudyus an siya. Amaschin màwa, ta na losani màwa machaychayaw à Apudyus mipakapun Jesu Cristu. Ta Apudyus na machaychayaw ya annan mannakafalinnà ing-ingkana. Amen.

Mapalikatan Na Mamati

Rom. 8:17-30; 1 Cor. 4:10-16; 6:1-11; 2 Tim. 3:12-17

¹² Fufurun-u wi ay-ayatò, achiayu maschaaw ta amod wi mapalikatanyu, tan amaschin màwa ta losani mamatin Apudyus à mail-an na katuttuwaan na pammatiyu. ¹³ Tan na oyyoonyu kuma, lagragsakonyun makalikatanyu ta napalikatan Cristu, tan na miparangan na machayawana sin-umisag na makaragragsakanyun siya. ¹⁴ Siyan lumagsak-ayu nu insurtuwon chiayu kapu ta summurutanyun siya, tan sachin mangipaila wi awad na machaychayaw wi Ispiritun Apudyus an chiayu. ¹⁵ Ngim masapur annachanyu ta nu mapalikatan-ayu, foon pu kumà kapu ta mangwaanyu ta lawing wi isun na pumatoy ya man-akaw ya makafiyang ta foon

à fiyangna. ¹⁶ Ngim nu kaspangalikan palikatan chiayu kapu ta namatiyanyun Cristu, achiayu mafain ngim manyaman-ayun Apudyus kapu ta niyamunganyun siya.

¹⁷ Chummatong na timpuy mangilukiyan Apudyus wi manguis ta taku, wi na oyyoona, mamanguwonan takuna. Ad nu uray chitau mamati kuisona, sin-umamod na màwa ta chachi achi pu mamati ta Mamfaruy Chamag wi narpun siya! ¹⁸ Tan awad na niyug-is wi ukud Apudyus wi anana,

“Nu nalikat na masaragnifan na mamfaruy taku, sin-umamod na màwa ta chachi mangwà lawing wi maid somsomòchan Apudyus!”

¹⁹ Siyan chiayu maparpalikatan kapu ta sachin pion Apudyus, ipapatiyuy mangwa ta ustu ya ipurangyu kon long-agyun Apudyus wi kattoi mapipiyar, tan siyan nangwan chitau.

5

Na Tudituchun Pedro Ta Mangipangpangu Fili. 2:1-18

¹ Annaya kon tudtuchù an chiayu mangipangpangu ta mamatiid asnat. Ya karobfongà wi manudtuchun chiayu tan saoni sunudyu, wi osay mangipangpangu ko, innilà na napalikatan Cristu, ad ako, milàamà ako ta machayawana wi miparangana. Siyan na itudtuchù an chiayu, ² masapur ayyuwananyun chachi mamati wi ipangpanguwi isù pannilun Apudyus, wi na mangwaanyu ta fiyangyu, foon kumà masapur maipapilit-ayu ngim mipakapu kay ta ayatyu. Ad ako, foon pu kumà pilak na pangkopyu

ngim kapu kay ta pionyuy mansilfin Apudyus.
³ Ya achiayu ko mammancharmanchar ta chachi nipiyan an chiayu, ta siya oyyoonyun long-agyu ustuy turachoncha. ⁴ Amaschin oyyoonyu ta nu mangulin à Apu Jesus wi isù Angatuwani Pastor, adchonan napatog wi kunkunayu wi machaychayaw ya mannaynayun.

⁵ Ad na tudtuchù akon chiayuy fabfafaru, masapur ifafayun somsomòyu ta chachi ummununa nu chiayu. Ya masapur ko wi waschi osa ipafafanan long-agna ta furunna kanayun, tan na niyug-is wi ukud Apudyus, anana, "Kuraon Apudyus na mangipangatu ta long-agna, ngim farfaruwongan mangipafafa ta long-agna." ⁶ Siyan mampafafaayun Apudyus wi mannakafalin ta ikadna wi mangipangatu an chiayu nu chumtong na ustuy timpuna. ⁷ Ya ipiyaryun losani problemayun siya tan siyan mangay-ayyuwan an chiayu.

⁸ Mansasagkanaayu kuma ya man-annad-ayu, tan na afusuryu wi Satan, isù layun wi nafangit ya mallifalifas wi man-inap à anona, tan pionay manachail an chitau. ⁹ Siyan papigsaonyun pammatiyu ta umisiayu ta iyawisna. Tan akammuyu wi na losani susunudyuy mamati ta arutaruta, man-iisun maliglikatancha wi isun akon liglikatyu. ¹⁰ Ngim foon pù iingkaw na malikatanyu, tan à Apudyus wi masmasayaaw, fadnganà chiayu ya pafaruwona ya papigsaongan pammatiyu ta achiayu pu maafak an Satan. Tan à Apudyus siyan namin chiayu mitapi ta mannaynayuni machayawana kapu ta niya-

munganyun Cristu. ¹¹ Siyan machaychayaw à ing-ingkana wi maid mapagpakan na man-nakafalinna. Amen!

Na Nampakumustaan Pedro Ta Taku

¹² Na annay aiti surat-un chiayu, impaiyug-is-un Silas wi ifilang-ù napipiyyar wi sunud. Ad na kakarà wi manurat an chiayu, masorkag kuman somsomòyu ya mangiyistikuwà ta katuttuwaan wi fachang Apudyus ya sayaawna. Siyan oognanyu chachi.

¹³ Na anchayanay mamatid asnay ili wi isù Babilonia, wi chinutukan ako Apudyus à mantakuna, losancha pakumustaon à chiayud asnat. Ya uray akò Marcos wi ifilang-ù anàu, pakumustaona kò chiayu. ¹⁴ Man-asipailaaayuy mansusunud ta ayatyu.

Iluwarù ta farfaruwon Apudyus na som-somòyu losan wi mamatin Cristu.

Na ukud Apudyus

Kalinga, Southern: Na ukud Apudyus New Testament

copyright © 1986 Wycliffe Bible Translators, Inc.

Language: Kalinga, Southern

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

14356fa9-7e1b-5386-9d16-f8048ccafddd